

Ukiumut aningaasanut inatsiseqarfiusumut 2015-imut Inatsisartut aningaasanut inatsisigallagassaat pillugu Inatsisartut inatsisaat

§ 1. Ukiumut aningaasanut inatsiseqarfiusumut 2015-imut Inatsisartut aningaasanut inatsisaata akuersissutigineqarnissaata tungaanut akileraarutit inatsisitigut tunngavillit akilersinniarnissaannut Namminersorlillu Oqartussat aningaasatigut isertitaasa allat pigiinnarnissaannut Naalakkersuisut piginnaatinneqarput. Piffissap tamatuma iluani aningaasartuutit Naalakkersuisut, sullissiveqarfuit suliffeqarfilla ingerlatiinnarneqarnissaannut pisariaqartinneqartut kiisalu suliniutit allat inatsimmik, siornatigut aningaasanut inatsimmik imaluunniit aningaasaliissutit tunniunneqartut allat akilernissaannut Naalakkersuisut piginnaatinneqarput.

§ 2. Nunamut tamarmut akileraarutip procentia allangguuteqartinnagu 10%-iussasoq aalajangiunneqarpoq. Nunamut tamarmut immikkut akileraarutip allangguuteqartinnagu 26 %-iuinnarnissa aalajangiunneqarpoq. Akiliisitsilluni aallaaniartitsinermi aalisartitsinermilu akitsuutit uumasumut ataatsimut umimmammut allangguuteqartinnagu 2000 kr.-imut, uumasumut ataatsimut tuttumut 1.000 kr.-imut, uumasut aallaaniartakkat aallaaniarsinnaanerannut akuersissut ullut unnuallu arfineq marluk aallartinnerannut 1.000 kr.-imut, aalisarnissamut akuersissut ullormut unnuamat/sapaatip akunneranut/qammammut 75 kr.-imut/200 kr.-imut/500 kr.-imut aalajangiunneqarpoq.

§ 3. Naalakkersuisut ukiumut aningaasaliiffusumut 2015-imut aningaasanut inatsisissatut siunnersuutip akueringarnissaata tungaanut piginnaatinneqarput Den Europæiske Union-imik (EU) piffissami 2014-2020-imut suleqatigiinnissamik isumaqatigiissutip 2014-2020-imut naatsorsuutigineqartutut -1.634.000.000 kr.-it tikillugit aningaasartalerlugu kiisalu Europæiske Union-imik (EU) piffissami 2016-2020-imut naatsorsuutigineqartutut ukiumut -129.623.000 kr.-inik aningaasartalerlugu isumaqatiginninniarnerit ingerlasut ingerlatiinnarsinnaanissaanut. Naalakkersuisut piginnaatinneqarputtaaq piffissami 2014-2020-imut EU-mik Danmarkimillu suleqateqarnissaq pillugu ataatsimut nalunaarummik atsiuisinnaanissaminut.

§ 4. Inatsisartut Aningaasaqarnermut Ataatsimiititaliaanit akuerineqartussanngorlugit Inatsisartut imatut piginnaatisipput:

- 1) Sanaartugassanut ingerlanneqareersunut katillugit 300 mio. kr. tikillugit aningaasartuuteqarsinnaanissamut.
- 2) Suliassanut pilersaarutigineqartunut aallartinneqareersimasunullu katillugit 30 mio. kr. tikillugit aningaasartuuteqarsinnaanissamut.
- 3) Namminersorlutik Oqartussat inissiataani attartortittakkani aningaasartuuteqaqqinnissamut iluarsaanissanillu aallartitsinissamut katillugit 50 mio. kr. tikillugit.

§ 5. Naalakkersuisunit akuerineqartussanngorlugit Inatsisartut imatut piginnaatitsipput:

- 1) Inissianik attartukkanik tunisineq –7 mio. kr. angullugit aamma tassunga atasumik 1,5 mio. kr.-it angullugit aningaaasartuuteqarsinnaanermut.
- 2) Boligstøtte atorlugu illuliat sinneruttut tunineqarnerinut –7 mio. kr.-it angullugit.
- 3) Nammineerluni illuliornissamut neriorsuinernut 20 mio. kr.-it angullugit.
- 4) Boligstøtte atorlugu illuliat iluarsaannissaannut tapiissuteqarnissamik neriorsuinernut 5 mio. kr. angullugit.
- 5) Boligstøtte atorlugu illuliat iluarsaannissaannut immikkullu ittumik aserfallatsaaliniisaannut taarsigassarsitsinermut 5 mio. kr.-it angullugit.

§ 6. Inatsisartut Naalakkersuisut piginnaatippaat:

- 1) Kalaallit Nunaanni ilaasunik, allakkanik nioqquqtsanillu assartuinermi assartuisartunik Aningaasaqarnermut Akileraartarnermullu Ataatsimiititaliap akuersissuteqarneratigut isumaqatigiissutissanik naammassinninnissaminnut kiisalu,
- 2) Aningaasaqarnermut Akileraartarnermullu Ataatsimiititaliap akuersissuteqarneratigut missingersuutinut sunniuteqartussaanngitsumik aningaaasartuuteqarnissaminnut Great Greenland A/S-ip 5 mio. kr. tikillugit aningaasaliiffingineqarnissaanut.

§ 7. Inatsisartut Naalakkersuisut piginnaatippaat:

- 1) aatsitassanut inatsit naapertorlugu akuersillutik nalunaaruteqartarnissaminnut aammalu aatsitassanut inatsit naapertorlugu akuersilluni nalunaarutaareersunik sulianik ingerlatseqqiinnarsinnaanissaminnut tassunga ilanggullugit atuinissamut akuersissutit aallartinnissaanut piumasaqaatinut aamma soorlu IBA isumaqatigiissutinut tunngatillugit isumaqatiginninniarnerik ingerlatsiinnarsinnaanissaminnut.
- 2) sulianut kinguartinneqarsinaanngitsunut tunngatillugu sulianik aalajangersimasunik aalajangiisarnissaminnut soorlu kulbrintinut tunngatillugu akuersissutinut nalunaarutigineqareersimasunut ilassutinik akuersisarnissaminnut sivitsuisinnaanerit, sulinissamut pilersaarutit apeqqutillu allat inuaqatigiit aningaasaqarniarnerat eqqarsaatigalugu Naalakkersuisunit aalajangiiffisariaqartut eqqarsaatigalugit.

§ 8. Inatsit una atuutilissaaq 1. januar 2015-imi.

Kalaallit Nunaanni Namminersorlutik Oqartussat, ulloq 1. oktober 2014

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut